

Ingerlatseqatigiiffinni Namminersorlutik Oqartussanit pigineqartuni siulersuisuni siulittaasussanik toqqaasarneq pillugu apeqquteqaat aallaavigalugu oqallisigisassatut siunnersuut.

(Inatsisartunut ilaasortaq Jens Napâtôk', Partii Naleraq)

Akissuteqaat

(Naalackersuisut Siulittaasuat)

Aallarniutigalugu Naalackersuisut Jens Napâtôk', Partii Naleraq qujaffiginiarpaat ingerlatseqatigiiffinni Namminersorlutik Oqartussanit pigineqartuni siulersuisuni siulittaasussanik toqqaasarneq pillugu apeqquteqaat aallaavigalugu oqallisigisassatut siunnersuuteqarnera pillugu. Tamatumuuna ingerlatseqatigiiffinni Namminersorlutik Oqartussanit pigineqartuni siulersuisut katitigaanerannut tunngaviit oqallisigineqarnissaat periarfissinneqarpoq.

Ingerlatseqatigiiffiit Namminersorlutik Oqartussanit pigineqartut inuiaqatigiinnut pingaaruteqartunik suliaqartarnerat nunamilu inuppassuarnut suliffeqartitsisarnerat pillugu siunnersuuteqartup oqaatigisai isumaqatigaakka. Ingerlatseqatigiiffiit inuiaqatigiit ineriartortinneqarneranni assiginngitsutigut pingaarutilimmik inissisimapput. Taamaammat Naalackersuisut anguniagarivaat ilisimasaqarluartunik piginnaanilinnillu siulersuisoqartarnissaq, tassa ingerlatseqatigiiffimmik naleqartitsilersarnermik misilittagaqarnerup piginnaaneqarnerullu saniatigut Kalaallit Nunaanni inuiaqatigiinnut tunngatillugu ilisimasaqarnissaq paasinninnissarlu soorunami piginnaasaqarfiussapput pingaarutilit.

Ingerlatseqatigiiffinnik Namminersorlutik Oqartussanit pigineqartunik piginnittutut aqutsinermi akisussaasuvoq Naalackersuisut Siulittaasuat aqutsinerlu ulluinnarni Naalackersuisut Siulittaasuata Naalackersuisoqarfianiittup Ingerlatseqatigiiffinnut Allattoqarfiup isumagisarlugu. Ingerlatseqatigiiffinnut Allattoqarfiup suliassaasa pingaarnerit ilagivaat siulersuisut piginnaasallit eqeersimaartullu katitigaanerannik nakkutiginninnissaq. Suliassaq taanna isumagineqassaaq Aktiaatileqatigiiffinnik Namminersorlutik Oqartussanit pigineqartunik aqutsilluarnissamut Naalackersuisut malittarisassaliaat 2012-imi Inatsisartuni partiinit tamanit tapersorsorneqartut naapertorlugit.

Ingerlatseqatigiiffinnik aqutsilluarnissamut malittarisassani ilaatigut Siulersuisut katitigaanerat aaqqissugaanerallu pillugit allassimasoqarpoq. Pineqartumi tassani siulersuisut siulittaasussaannik inuttalersuisarnermi inuiaassuseq imaluunniit attuumassuteqarneq aallaavigalugit toqqaasoqarnissaanik malittarisassaqanngilaq. Pingaarnerutinneqarpoq siulersuisut piginnaasaat ingerlatseqatigiiffimmillu naleqartitsilersinnaanerat aallaavigalugit katitigaanissaat.

Siulersuisut maanna katitigaanerannik ingerlatseqatigiiffinni ataasiakkaani inuiaat assigiinngitsut inuttarineqarput, tamanna aamma siulersuisuni siulittaasunut atuuppoq, kisianni siulersuisuni amerlanerpaani tamanna nalinginnaasuunngilaq. Taama ittunik inuttaqartarneq ingerlatseqatigiiffiup siunertai imaluunniit piffimmi inissisimanagera aallaavigalugit isigineqassaaq. Ingerlatseqatigiiffiit tamarmik ingerlatseqatigiiffiup pisariaqartitai niuernermilu piumasaqaatai aallaavigalugit piginnaasanik aalajangersimasunik pisariaqartitsisarput.

Naalackersuisut susassaqarfimmi suleriaaseq atuuttoq ataatsimut isigalugu iluarisimaarpaat, tassa ingerlatseqatigiiffinni Namminersorlutik Oqartussanit pigineqartuni siulersuisunik pikkorissunik piginnaasaqartunillu katiterisarnermik ukkataqarneq iluarisimaarpaat. Tamanna periaasiuvoq niuernermi pissutsit tunngavigalugit pikkorinnerusumik ingerlatseqatigiiffiit ingerlanneqarnissaannik qulakkeerinnittussaq aamma naalackersuinikkut aqutsisunit toqqaannartumik akulerutsitsinaveersaartussaq.

Naggasiullugu erseqqissaassutigineqassaaq Naalackersuisunit pingaartinneqarmat ingerlatseqatigiiffinni siulersuisut ilisimasalinnit katiterneqartarnissaat, tassunga atatillugu ilaasortat amerlanerusut Kalaallit Nunaanni najugaqartuunissaat sulissutigineqarpoq.

Naalackersuisuniit taamatut oqaaseqarluta Inatsisartut oqallinnissaat qilanaaraarput.